



# Meh Nax Najseng Ndeu

## 一位陌生的阿姨

Youq seiziq gou, boux gou ceiq haenggyaez caeuq boiqfug haenx dwg meh nax mbouj roxnaj ndeu.

Ndwenngux ngoenz banringzgvaq ndeu, mbwn oem raixcaix, gou caeuq daxmeh naengh ci bae ranz bohnax lajmbanj guhcaemz. Youq baihnaj gou naengh dwk meh nax byoem dinj

ndeyawj ndeu, de daenj geu buh hoengzmaeq. Gou doiq daxmeh gangj: “Geu buh mehnax caen gyaundeidei ha.” Mehnax cienqndang yiengq gou ngaek gyauej riu lo. Aenci hai hwnj diuz lohbya vanvan ngutngut bae, daenh lai lo. Gvaq yaep ndeu, gou roxnyinh gyauej ngunhsumsum, naemj rueg, gou ngamq dajsuenq cienq gvaq cuengci bae, hoeng, lij dwg nyaenx mbouj ndaej “va” sing ndeu, rueg ok gij huquq sinz bae baihnaj, sinz daengz raeblaeng geubuh gyaundeidei mehnax

lo. Gou naemj dai lo, haengjidingh ngaiz mehnax ndaq lo. Daxmeh doq ganjgip aeu soujgaen daeuj uet geu buh mehnax, doq doiq mehnax gangj: “Doiq mbouj hwnj, doiq mbouj hwnj!” Mehnax duet geu buh uq roengz, daj ndaw daehriuj dawz ok geu buh doiq saek ndeu daenj hwnj, yienzhaeuh riu dwk naeuz: “Lwgnyez ngunh ci cij ngaiz rueg, de youh mbouj dwg daegdaengq, mbouj youqgaenj.” Gangj sat, de lij daj gyang daeh dawz ok song naed yw’ ngunhci hawj gou gwn,

daxmeh lienzsing naeuz: “Gyo-mbaiq! Gyo’mbaiq!” Gwn gvaq yw, gou roxnyinh ndei di lo. Mehnax cam gou: “Nuengxiq, seizneix ndei di caengz?” Gou ngaekngaek gyauej. De youh daj gyang daeh dawz ok aen makbingzgoj youh hung youh nding ndeu hawj gou gwn. Gou yawjyawj mehnax unqswnh neix, youh yawjyawj aenmak gyang fwngz, sim naemj: Meh nax neix geij ndei ha! Gyoengqvunz gwnz ci hix yawj coh de, da cungj dwg haenhndei. Ci daengz camh lo, caezgya hix roengz ci lo, gou yiengq mehnax gingq le aen laex ndeu.

Gou yawj dwk raeblaeng mehnax hungsang byaij gyae, ndaw sim majok cungj gamjcingz maijgyaez caeuq gingqcungh ndeu!

(bouxsiy: Fouzcoh bouxhoiz: Ouh Caijfangh)

## Lau Dajcim

### 针尖上的恐惧



Ceiqgaenh, laengdin gou ok-yienh geij naed banqnding, mbouj in mbouj humz, hoeng daxmeh nyengh daiq gou bae yihsen genjcaz.

Youq ndaw yaenqsiengq gou, haeuj yihsen couh dangq “bae dajcim”, ndigah, baez yamq haeuj aending mwnzcinj yihsen, gou couh laulili. Gou nod song cik ga, mbouj cingznyihsen saek di riengz laeng daxboh daxmeh, caen dwg yamq-yamq simdiuq ya.

Gvahau ndaej le, dou daeuj-daengz bizfuhgoh. Naengh youq dangqnaj canghyw, gou ngaizngaiz ngednged duet haiz caeuq duet mad. Canghyw riu hwnj faj din gou, sijsaeq ngonzyawj gij banqnding haenx, youh heuh daxboh yungh fwngz naenx roengzbae, lij cam gijwnq cingzgvang dem. Doeklaeng,

de cibfaen haengjidingh doiq dou naeuz: “Dwg gyakauej. Danghnaeuz dwg gominj couh mbouj suenq naek, gwn di ywgominj couh ndaej lo.” Gou baez dingqnyi mbouj yungh dajcim, ndaw hoz gag riungoemx. Danhseih gou angq ndaej daiq caeux lo, aenvih canghyw youh naeuz: “Vihliux dawzcinj di, genyi guh baez lwed cangzgeih genjcaz ndeu, aenvih gyakauej yungzheih sieng daengz aenmak.” Gijmaz? Gou cungj deuz mbouj gvaq dajcim.

Gou fwngz gaem song mbaw vanendan, doeknaiq segseg gaen laeng daxboh daxmeh daengz dieg aeu lwed. Dieg aeu lwed dauqcawq dwg gij sing daej lwgnyez, gij sing bohmeih nai lwgnyez, gijneix hawj gou engq lau lo. Mwh baizdoi, fajfwngz gou saenzdwdwd, miz geij

baez lwnz daengz gou, gou cungj ndoj haeuj rae baux gaenlaeng bae, doeklaeng, gou lij dwg cengqgengz gyauejndongj sim diuqbubbub ndwn daengz dangqnaj dieg aeu lwed bae. Seiz fag cim baek haeuj gij naeng gou yaephaenx, gou baez haebfaenz, lwed cix aeu ndaej lo! Yi, gaenbonj mbouj raen baenzlawz in, yawj daeuj, gou dwg simvueng gvaqmauh lo.

Baez ceiq dwglau haenx gvaq-bae lo, caen hawj vunz sim’ angq, gou gijmaz saeh cungj mbouj miz, caenh gwn di ywgominj couh ndaej lo. Ginggvaq gienh saeh neix le, gou caiq hix mbouj lau dajcim lo.

(bouxsiy seiq nienzgaep Loz Veizyih bouxhoiz:Goenggen)

## Siengjniemh Daxbuz

### 想念奶奶

Daxbuz gou gaenq gvaqseiq seiq bi lo, hoeng gij najriu de ciengz youq ndaw uk gou okyienh.

Gou daegbied gyaez gwn gij haeux daxbuz cawj haenx. Gij haeux daxbuz cawj haenx gig feihdauh. Seizneix, moix baez siengj hwnj gij haeux daxbuz cawj haenx, myaiz gou couh rih roengzdaej. Gou ceiq gyaez gwn souhhaeuxyangz daxbuz cawj haenx, caiq boiqhwnj geij deb byaek feihdauh, cungj ndei gwn haenx sawj gou baenzlawz cungj lumz mbouj ndaej.

Moix bi seizdoeng, daxbuz cungj guh buhmienz hawj gou. Gij buhmienz daxbuz guh haenx youh unq youh raeuj. Gou daenj le, mboujguenj youq baihrog guhcaemz geijlai nanz cungj mbouj roxnyinh nit.

Seiq bi daeuj, gou cijaeu siengj daengz caiq hix yawj mbouj raen najriu daxbuz, mbouj ndaej gwn haeux daxbuz cawj, mbouj ndaej daenj buhmienz daxbuz guh haenx, raemxda gou couh nyaenx mbouj youq lae roengzdaej.

Daxbuz, mwngz youq gwnz-mbwn lij ndei lwi? Gou caen siengj mwngz ha!

(sam nienzgaep Yangz Yijcenh)



## Dik Lwggienq



Gij saeh moix ngoenz hawj gou ceiq angq haenx couh dwg lienh dik lwggienq.

Neix mbouj dwg ma, ma daengz ranz, gou youh dawz aen lwggienq nyinhcaen dik hwnjdaej, hoeng de baez daengz ndaw fwngz gou, mbouj dingq gou sawjyungh, gou baez dik, de couh doek roengz gwnz deih, lumjbaenz yiengq gou doxnyex: “Daeuj lo, daeuj lo, dik mbouj dawz……”

Ngamq hainduj gou caenh dik ndaej saek song aen, hoeng gou mbouj doeknaiq, laebdaeb lienh dik. Yienz-naeuz aennaj gou mbaet ndaej hoeng-fodfod, hoeng gou couh mbouj saenq ceihfug mbouj ndaej aen lwggienq neix. Yienghneix, gou sikhaek gip de hwnjdaej, caiq dik, naemjnaemj gij fuengfap youqgaenj bouxwnq son gou haenx, mbouj dingz haglien, doek-

laeng, dik ndaej seiq haj aen lo, ndawsim gou gaej naeuz miz geijlai angq ho! Gou engqgya mizyinx lo, ngoenzngoenz lienh, ciemhciemh, gou gingqyienz dik ndaej bet gouj aen lo.

Doq dik doq dik, gou sawqmwh fatok cungj siengjgap geizgvaiq ndeu, siengj guh aen dungcoz ndei yawj ndeu, yienghneix, gou gaem aen lwggienq baez gveng coh gwnzmbwn, cunjbei fan din dik doxhwnj, hoeng mbouj naemj daengz capmax mbouj maenh, ga’ gvaz baez unq, “budung” sing ndeu, gou doq laemxbob roengzbae, in dwk gou hemqvauvau, hoeng gou mbouj lau, dauqcungz gip aen lwggienq hwnjdaej, gou siengsaenq, gou itdingh ndaej hawj de dingq gij vah gou.

Yienznaeuz gou seizneix cij dik ndaej geij aen, hoeng, gou yae engqgya roengzrengz, ceng’ aeu dik ndaej engq lai. Dik lwggienq gawq ndaej lienh ndang gou, youh ndaej lienh gou hozraez, caen dwg gienh saeh ndei guh it ndaej sueng ndeu.

(bouxsiy: Hoz Gyahvanz bouxhoiz: Goenggen)